

CREPIS MACROPHYLLA.

CREPIS foliis inferioribus ovato-oblongis , pilosis , inæqualiter dentatis ; pappo stipitato , simplici.

CAULIS 3—6 decimetr. , erectus , striatus , ramosus , pilosus , scaber. Folia hirsuta pilis brevibus ; inferiora 1—2 decimetr. longa , 5—6 centimetr. lata , inæqualiter dentata ; superiora lanceolata , amplexicaulia. Flores numerosi , corymbosi. Pedunculi inæquales , uniflori. Flos magnitudine C. biennis Lin. Calyx calyculatus ; exterior laxus , glaber ; squamis ovatis , margine membranaceis ; interior cylindricus , foliolis linearibus , acutis , subæqualibus , brevissime hirsutis. Ligulæ flavæ. Semen elongatum , tenue , glabrum , fuscum. Pappus simplex , niveus , stipitatus. Receptaculum nudum. Affinis C. bienni Lin. Differt foliis inferioribus ovato-oblongis , latioribus , dentatis nec runcinato-pinnatis ; pappo stipitato.

HABITAT Algeriâ ad agrorum cultorum limites.

CREPIS TARAXACOIDES.

CREPIS foliis profunde runcinatis , hirsutis ; lobis dentatis ; pedunculis elongatis , subnudis , pilosis ; calyce tomentoso.

PLANTA sæpe 2 decimetr. et ultra , basi decumbens. Folia fere L. Taraxaci Lin. , hispida , profunde runcinata ; lobis dentatis , a basi ad apicem petioli sensim crescentibus. Pedunculi elongati , asperi , subaphylli , hispidi , pilis brevibus et squamulis nonnullis obducti , uni bi aut multiflori. Calyx calyculatus , cylindricus. Folia exteriora ovata , margine membranacea , laxiuscula ; interiora subæqualia , linearia , villosò-tomentosa. Diameter floris 17—22 millimetr. longa. Ligulæ luteæ. Pappus villosus , simplex , stipitatus , albidus. Receptaculum nudum.

HABITAT in arvis. \mathcal{Z}

HYOSERIS.

CALYX calyculatus , adpressus ; foliolis interioribus linearibus , semen nudum includentibus. Semina in disco setis radiatis , rigidis coronata.